




禮儀典第九十六卷

喪葬部藝文四

惠莊太子哀冊文

張九齡

維開元十二年歲次甲子十一月丁巳朔二十四日庚辰司徒申王薨於行在所冊諡惠莊太子旋殯於寢粵閏十二月二十七日壬午將陪葬於橋陵之柏城禮也黼幕宵布羽纛宿設西序啟攢南首成列皇帝深天倫之感崇后儲之禮擬容衛於青宮申孔懷於朱邸爰命史氏稽於令則無俾直書不彰遺德其詞曰

昊天有命先后受之分王子弟藩衛京師克荷成憲罔不肅祗懿哉明哲誕惟神粹宣慈日聞孝友天至道則昭合跡無自異性實生知學兼時習易微書達詩言禮立德必有鄰善如不及貴而能損量固難挹方伯出鎮召南取斯司徒入掌鄭武其宜義之所在政乃克施物留遺愛事著成規西夏息人東征叶卜鞞鞞同軒皇皇改服疾道中路凶傳左轂寧不慙遺奄鍾斯酷嗚呼哀哉昔在妙沖具惟兄弟四國並封五王均體遊必聯騎居前同邸各承愛於含飴俱受經於置醴旣荏苒而云邁

屬殷憂之將啟實定禍於蕭牆遂繼明於雲陛雖隔深宮之衛常洽家人之禮曷殂謝以痛心感平生而流涕嗚呼哀哉爰擇茂典將崇上嗣表先聖之元良申友于之褒異紛鹵簿以徒設儼文物而空備彼神儀之如在乃羣悲之所萃周禮從祔漢塋是陪先遠日而撰吉會同盟以送哀夜漏盡兮暗室啟庭燎殘兮晚輓催按三校而徐進將一去而不廻嗚呼哀哉背朱門兮遲遲馳白驥兮騃騃野蒼茫而助慘風蕭颯而增悲翩翾兮素蓋寂寂兮畫帷遵舊途而何有覽陳迹以如疑面都邑兮不入侍陵寢兮有期惟先儀之永闕與昭代而長辭嗚呼哀哉潛清暉於幽夢昭鴻名於美跡將在皇儲之史豈伊諸侯之策播遺芬於蘭桂傳不朽於金石諒紀言之在茲嘉德音之無斃嗚呼哀哉

讓起復表

前人

草土臣九齡言伏奉去年十二月十四日制書復臣中書侍郎同平章事者外沮公望內奪私情餘生力微哀怖殞絕臣某誠哀誠懼死罪死罪伏以宰臣所職贊理庶事陶冶太和以遂萬物苟非所任有受其殃臣實單人本無大用況在艱疚觸緒哀迷矧以素所不堪加之荒塞而軍國事重翼亮誠難臣獨何人謬居此地退省所有負敗將及雖願感恩扶力匍匐祇命其如塵玷聖鑒汚辱台衡

於國非急於理虛廢臣比年限役多闕晨昏疾疹之際遽乖救藥凶譚之日遠隔追攀而星霜未周冠纓載迫是以庭闈昔絕几筵今阻凡曰名教實所深哀伏惟睿情有以永錫況質言非讓終悲款不文祈天之心惟聖所體實冀哀素有次喪紀獲俯察荒迷乞遂情禮臣無任感絕哀迫之至謹詣朝堂奉表陳乞以聞臣誠哀誠懼頓首頓首死罪死罪謹言

節愍太子妃楊氏墓誌

張說

開元十有七年二月癸未中宗節愍太子妃楊氏薨於京師太平里第之內寢越五月丙申詔葬於新豐之細柳原黃陵下從古之道也嗚哉哀哉妃氏之先代居河華赤泉啟國清白傳家東都之公胄西晉之後族高祖士達隋開府納言天授中以孝明高后之父追封鄭王贈太尉曾祖緘隋符璽郎抗節王充朝廷旌載贈靈州刺史祖全節左內率贈魏州刺史考知慶千牛豹韜二將軍若夫軒冕王官同許史之繁漢婚姻帝室比姜姑之宜周是故二華降靈五河飛譽拜玉冊於文廟儷金璽於青宮入參視膳之儀出友元真之樂禮陪璽館祭服始於北郊詩贊鵲巢王化終於南國豈知言違闕水神往邨山七日之望不歸千秋之言何及於是視身知苦幽探白馬之偈

覺心等空生證青蓮之葉久以喬木無怙柏舟早誓棣華先落聖善相依闔門正家稱未亡而全禮高堂終養不勝哀而遂絕此又禮外之禮孝中之孝者也初上在東宮妃有女弟選爲良媛生忠王卜者曰不宜養爰自襁褓命妃舉字及開元正位良媛爲嬪而卒妃之視忠王也隱親之訓誨之竭從母之仁慈倍猶子之珍愛忠王之託妃也敬愛焉聽順焉生盡因心之樂沒過如母之感且夫慈懋鞠育孝思顧復仁叶恩親愛備恭睦成天下之百行致生人之五福斯蓋皇極之端國風之首者矣湖陽王當小宗之祭元妃之喪故喪挾兩孤而祭殷二國何必鼓吹山上遙傳慈母之名石闕廟中獨立少姨之像史官承詔勒銘沈碧詞曰

太華北足長河東肘總粹陰靈妃德儲后鳴美玉佩爛光金鈕貴嬪長姨寵王從母永訣上賓死孝哀親顧懷孺子忍別夫人昔貞萬國今撫百神泉燈我夜宮樹他春陵麥秀兮漸漸隴月生兮纖纖灞岸去兮無還日青門絕兮不可瞻石獸澀兮綠苔黏宿草殘兮白露霑園寢閉兮脂粉膩不知何人兮開鏡奩



草土臣說言臣荒喘窮情再黷旒屢懇誠不到未感天心誓將冒死祈恩分外臣本書生門非代祿  
數葉單緒族無親房臣父遭憂曾祖未葬臣有兩兄一妹甥姪九人又有中表相依尙成百口吉凶  
衣食待臣以辦臣今拜職黃閣侍奉丹墀厚祿清班一朝改官舉宗榮賴爲幸過甚人情所欲豈合  
稽恩正以煢煢苦心有所未盡臣亡母在日朝夕誠臣以臣獨立無徒好直多忤知子者母果驗所  
言往罹大獄竄命炎海晨出晚歸貽慮非一況涉危難傷心幾途追計生平倍增摧慕侍養日少違  
離日多卽臣母憂臣以終身臣其忍服衰以從事情旣不同常例望在特降殊恩臣先患風緩近加  
虛痺陛下儻從臣數月容過再期非但寬其哀疚固亦全其生理亡身報國庶竭後圖木植有性枉  
之則折人願在心違之則苦雖強爲用將何以堪銜泣仰天冀蒙哀允無任懇迫之至謹詣朝堂路  
左奉表陳乞以聞

讓奪禮表

吳競

草土臣競言伏奉去年八月十日恩勅追臣赴京起復尙書水部郎中依舊兼判刑部郎中知國史  
事聞命驚兢心手無措臣競中謝臣行負幽明禍延所怙銜哀茹血五情崩潰卜鄰之訓永慕不追

陟帖之感窮哀已及但心同木石未能自死豈悟皇明旋加辟命且臣聞在家稱孝居國必忠苟違斯理實虧禮教焉有躬嬰荼毒而跡忝南史首伏苦廬而名叨東觀將何以發揮帝典褒貶人倫定一代之是非爲百王之準的臣不敢遽喻前古廣飾浮辭自近歲以來起復者則有御史大夫解婉黃門侍郎張說工部侍郎蘇頲皆訴哀陳款特蒙矜遂此實成例竊敢庶幾伏願陛下敦孝理之風全通喪之典追收綸煥俯納懇誠許其畢疚私庭終服凶次獲申負土之禮用展攀柏之悲則雖死之年猶生之日無任荒迫之至

## 第二表

前人

草土臣競言頻表乞哀誠辭已罄未蒙矜亮獎喻彌切鞠躬周章倍增號震臣聞自昔墨衰本因兵革權宜變禮不爲文儒後來浮薄寧存喪紀事匪軍容亦從權奪陛下休明撫運景業惟新伏望革近代之澆漓復先王之至德況史官之任爲代準的若苟違情禮輒徇恩榮覲目強顏操簡書事適足玷聖朝之孝理何以樹終古之風聲特乞天慈少加矜察使畢情苦萊少申悲露則天地之恩實爲至厚臣子之道幸此克全無任懇迫之至謹詣朝堂路左奉表乞哀以聞

第三表

前人

草土臣競言去年九月一日冒死哀訴冀得終服私門天睠猶邈未垂哀察跼影窮號罔知自寘又奉十一月二日勅史館要才須從權奪宜令州縣敦諭發遣者伏對崩號觸緒屠裂臣某中謝臣孝虧誠感奄遺憫凶瀝膽銜荼崩心茹棘冠骸殘喘冀生全大澤曲私屢加奪命令居史閣是掌記言臣昔忝此官十有餘載才輕寄重答效無施未能褒貶有章使人倫知勸典謨大訓與日月俱懸卽微臣平日其曠職如此今心形殞越荒疾失圖寧可重處南董之司頻叨班馬之列實貽貪祿之咎更招廢禮之辜顧視等夷何施面目且三年之制貴賤同遵四時之應几筵是託乞歸身苦壤趨侍松塋既不負素心亦不玷皇化干黷已屢伏待刑書無任崩迫之至謹詣朝堂路左奉表乞哀以聞

惠宣太子哀冊文

韓休

維開元二十二年歲次甲戌月庚申朔十日己巳司徒薛王薨於洛冊諡惠宣太子翌日殯於正殿之西階粵八月二日庚寅將陪葬於橋陵禮也涼陰戒秋白露凝夜倏哀挽於郊道儼虛容於



池榭皇帝痛棣華之旣凋，囑蘭坂而增歎。撫徹奠以無及，恨潛泉之永闕。光乎典冊，昇彼儲嗣。爰命史臣，臚言其懿。其詞曰：

於昭帝系，濬發元裔。逮堯升唐，自薛而王。粵有成德，遂荒東國。大啟土宇，聿崇典則。夫其秉靈在初，迪哲惟睿。睿敏秀鑠，淳龐淑慎。謀謨以成，蹈道而順。文英獨越，武烈惟振。百辟式瞻，五宗以訓。惟茲大賢，克懋天叙。爲藩爲屏，是輔是弼。保釐我邦，家左右我。王室沛獻，演易楚元。說詩藝無，不綜學罔有遺分。以寶玉建其旌旗，出弘聲政。入贊雍熙，咨爾公族。是惟敦睦。王曰：命弟寵其車服，俾侯於京。怡怡弟兄，穆以家人之禮。崇其藩后之榮，曷常不樂。彼同輿却東平之歸，奏詢其異政。欽少海之能名，將以天倫之愛，可以昭於載籍。友于之道，可以貫於神明。宜其善有其慶，禍無其胎。享此肩壽，祐其多才。胡勿藥以爲疾，逮彌旬而成災。躬爲禱兮，無不至誠。以請兮，無不備走。羣祀以累，祈徵上醫而畢。洎蒼黃而晦明未隔，閭忽而古今斯異。嗚呼哀哉！神理無昧，人實已非。想河樂其猶在，望淮仙而不歸。悲由中而自切，情限禮而相違。帳內舍而云遠，飾承華以增暉。嗚呼哀哉！靈龜兆吉，服馬先路。悼津門之永違，遵河橋以直度。笳哀洛陽之道旣靡，咸京之樹換憂歡。於今昔變風景於新故，嗚

呼哀哉夫行以謚尊恩由禮盛申備物以增飾緬貞徽而獨映俾重爲善之名以彰有後之慶嗚呼  
哀哉庭榭撼以驚秋川波咽而不流歷神臯兮望園寢背華宇兮歸山丘歷塵滿兮虛榭暗綠苔生  
兮行徑幽惟盛德與鴻烈亦天長而地久嗚呼哀哉

眞順皇后哀冊文

徐安貞

維開元二十五年歲次丁丑十二月庚子朔七日丙午惠妃武氏薨於興慶宮之前院移殯春宮  
麗正殿之西階粵翌日命有司持節冊謚曰眞順皇后以旌德飾終也洎明年春二月己亥朔二  
十二日庚申將遷座於敬陵禮也啟櫬途於春禁候重門於初旭轉靈衛於金根緬哀懷於上國  
亦既有命銘於貞玉其詞曰

風之始著

缺二字

備內職選才淑政兼翌戴化錫丕祉繁華鍾美我天后之從孫周桓王之季子於渭

之涘重開戚里鸞鸞飛翔珮玉鏘鏘自莘野而三命乃率先於鴈行出言有章彤管有光孝慈之心  
諒自天啟鞠育孫幼恩流愷悌七子旣均六宮有禮貴主三分於外館賢王兩闢於朱邸彼陰教兮  
惟微承日月之光輝輔聖人之至德故動用而無違驪谷湯泉天行慕律屬車之內陪遊之日孰謂

蕩邪茲焉遇疾缺焚香山以邀元吉却屑重城彌留永畢思勿藥之有喜痛還年之無術嗚呼哀哉  
覽舊館兮洞開踐芳塵兮徘徊指甘泉之畫像謂德容之在哉自昔層城之宮椒風之殿獲遇明主  
是矜邦媛有平生之渥恩無淪沒之餘眷況真順之寵錫伊往古之莫見卜兆考常三龜既良園陵  
蒼蒼在國之陽傍芙蓉而左轉怨桃李之春芳風卷旌旆繁笳委咽中使護道懿見辭訣山藏玉衣  
地留金穴惟清灞之永矣流國風而不竭嗚呼哀哉

恭皇后哀冊文

韋良嗣

維開元二十八年歲次庚辰月朔日靈皇后元氏薨於西京之第旋窆於某塋天未忘釁相次殂  
落其明歲十一月二十四日王薨在殯制冊爲讓皇帝且有後命追諡妃爲恭皇后蓋以王有讓  
統之實而妃有恭德之美所以考行追崇皆聖皇天倫篤愛有光於古先者也粵天寶元年五月  
乙巳朔十七日庚申將遷祔於惠陵王薨及葬凡爲七月天子之禮也命侍臣叙以書冊其詞曰  
皇矣有熊處於元宮衣冠所在祇祠無窮以武而興復於土中以文始大元氣比崇展我邦媛倫昭  
有融至靜委和如天克令莫莫中谷天天作詠黃纁尊容素紗增映鑒圖閔史陰儀壹政帝寵元昆

妃承累命降家人之禮擬陰安之盛鵲巢化行人倫以正或幾望於終古故守沖而益敬祥開夢兆服媚蘭蓀女延湯邑男受推恩綠車齊軫綵戟盈門各稟柔訓常貽話言天授戩穀無非播諦歸暉事凶毀臺成沴圓月忽蝕朝雲亦霽滅彩韶陽收華邸第嗚呼哀哉魯宮未考漢門處哀帝以讓而追諡后從夫而永陪綸輦暫舉璋瓚誰開用小君之備物怨吾王之不來嗚呼哀哉娥輪半上蜃輅將移逗雙旒兮遲遲卷六衣兮披披青門一別兮不駐素澹既濟兮相隨入長陵之松柏顧漢苑兮參差司馬門兮壘壘恭后墳兮在斯嗚呼哀哉

贈婕妤董氏墓誌銘

常哀

維唐至德元年歲在癸卯十二月二日美人河內董氏終於闕鄉縣別館春秋一十有八嗚呼哀哉美人蘭質幽閑茗華婉麗出自漢皐之曲降於巫峽之陽柳絮題詩椒花獻頌德行日成於天性藝能豈假於師資既彰絕代之資雅叶良家之選瑤臺入寵金屋流芳映月幌而方娥上星樓而比婺恩多不恃顧重無矜讓以同車恭而避寢紫庭著美彤管旌賢屬綵仗巡遊花鈿侍從方執巾於上陌忽蒙被於離宮天道如何泉扃已矣聖上顧懷淑慎言念恩情悲遽天於先春歎長

歸於永夜追加班女之秩式慰衛兒之魂以某年月日葬於某原禮也乃命侍臣紀於貞石銘曰  
二九之年麗容嫣然春風轉蕙秋水開蓮浣紗選貌納袂求賢承恩玉殿侍宴瓊筵光陰不借天道  
何偏椒房愛促蒿里悲纏婕妤寵贈女史芳傳丹鳳城外黑龍水邊嗚呼此地永閉神仙

貞懿皇后哀冊文

前人

維大曆十年歲次辛卯十月辛酉朔七日丁卯貴妃獨孤氏薨粵明日追諡曰貞懿皇后殯於內  
殿之西階十三年十月癸酉乃命攝太尉銀青光祿大夫守門下侍郎同中書門下平章事河內  
郡開國公常袞持節冊命以其月二十五日丁酉遷座於藏陵禮也素紗列位黼帟周庭輅升玉  
綴軒缺珠櫺皇帝悼鸞掖以追懷感麟趾而增慟備百禮以殷遣命六宮而哀送宗祝薦告司儀  
降收爰詔侍臣紀垂鴻休其詞曰

祚祉悠久寵靈誕受元魏藩戚周隋帝后五侯迭興七貴居右肇啟皇運光膺文母纘女是因以綱  
大倫生知陰教育我蒸人瑞雲呈彩瑤星降神聰明睿知婉麗貞仁惟昔天鑒娉求才淑龍德在田  
萬覃于谷周姜胥宇漢后推轂王業惟艱嬪風已穆繼文傳聖嗣徽克令不曜其光乃終有慶祇奉



園寢肅恭靈命越在哀榮聿追孝敬文織絲組朱綠元黃上供祭服以祀明堂法度有節不待珎瑣  
篇訓之製自盈縑緇叙我邦族風於天下始於憂勤叶成皇化慈厚諸女寵臨下嫁登進賢才勞謙  
日夜服繒示儉脫珥申誠訪問後言譙遊夙退內和羣娣動有矜誨外睦諸親泣辭封拜闕翟有期  
親蠶俟時忽歸清漢言復方祇萬乘悼懷羣生慕思玉衣追慶金劍同儀嗚呼哀哉去昭陽兮窅然  
乘雲駕兮何在人代宛兮如舊炎涼倏兮已改翠葆森以成列素旗儼而相待言從玉兆之貞永闕  
瑤華之綵別長秋之西苑過望春而南登招帝子於北渚從母后於東陵下玉清兮動金翠外無像  
兮中有憑合簫挽而攢咽從雲雨之淒凝吾君感於幽期俯層亭而望思慘嬪媛以延佇極容衛之  
盡時搖巾袂兮遠訣隔軒檻兮羣悲不復見兮迴御輦傷如何兮軫睿慈下蘭皋兮背芷陽旌悠悠  
兮野蒼蒼帶白花兮掩淚衣元愴兮斷腸當盛明之共樂忽幽處兮獨傷去故庭兮日遠卽新宮兮  
夜長綈無文繡之飾器無珠貝之藏蓋自我之立制形有國之大坊嗚呼哀哉見送往之空歸歎終  
焉之如此方土神兮是與非甘泉盡兮疑復似遺音在於玉璫陳迹留於金屮獻萬壽兮無期存二  
南之餘美嗚呼哀哉

爲李給事讓起復尙書左丞兼御史大夫第二表

獨孤及

草土臣某言臣昨以哀

缺

愚懇昧死上陳冀回日月之光曲成螻蟻之志伏奉丁酉詔報未蒙矜允

捧讀聖旨五情殞絕中謝臣伏以適四方宣王命之任必擇職位素高聞望素著學能專對有餘力者以充其選臣以宗室末屬妄荷寵命維才與知俱不如人況今衰羸殘喘加以病苦支離沈痼歷夏及秋終日不過一食不杖不能自起自料若力疾祇命適數千里雖欲自強必中道委頓聖書詔旨廢失是憂臣伏見廣德二年七月赦書罷天下起復之官俾終喪禮此陛下孝德過於雨露然渙汗之發率土霑濡豈獨令臣隔在赦外又尙書右丞會府之樞轄御史大夫天下之準繩宣慰巡撫朝廷之大寄今臣授此三職而以起復爲名因臣過舉破陛下法今使百寮師師何以取則臣夙遭不造備生人之艱官始一命先臣棄背養母鞠育至於成立遭罹二京覆沒弟以宗室見害臣惴然茹痛獨侍板輿備嘗險阻莫及榮養纔擢掖垣慈顏違代罔極之痛終天莫追今靈筵未塵墳土尙濕遽命臣荷金印之寵處皇華之榮使總帷廓然奠祭無主此恆情之所不忍也陛下其忍之乎伏乞聖慈曲臨皇明下照矜臣哀療察臣不逮更擇時彥授之使職許臣得以羸骸終其喪紀實天地

之施鍾於臣身儻殘魂不滅朽質川委誓當摩頂至踵以答聖造臣無任哀療懇迫之至

第五表

前人

臣某言去年十一月某日又詣銀臺門上表陳乞至今積旬未奉恩旨屏營無地哀惶疚心臣某中謝臣蕞爾朽質叨奉明恩違天固辭豈不知罪實由恃陛下蒸蒸之德故敢守臣子區區之意伏以忠孝之道禮生於情資親事君愛敬同等臣生處聖代齒力未衰致身日長效節途遠獨慈親違棄永往莫追先王制禮居喪之紀有限昊天不弔欲報之德罔極而含哀茹痛緘衰日月恃寵干貴雖欲僂俛從事使臣何以爲心蓋三年之喪金革無避自魯公伯禽晉襄公始也實以徐戎秦師之役有爲爲之非是則否故孔子對子夏問曰以三年之喪從利者吾不知也今朝無徐秦之難臣非金革之任竊陛下名器是從利於喪也食稻衣錦之責捨臣誰歸凡曲全萬物使不失情天地之仁也鞠育嫗煦知寒熱疾痛父母之慈也兼仁慈而有之明君之惠也臣是以又陳惻款昧死上言竊希天父之恩不奪臣子之志泣血待罪惟陛下省察無任

爲李懷光讓起復第二表

前人

草土臣某言一昨具陳哀懇冀蒙諒察旋奉墨制有阻微誠精神震蕩五內分裂中謝臣爲學至淺昧於禮經今冒死上聞實私情懇迫臣年未弱冠卽罹閔凶終鮮兄弟惟臣與母零丁孤苦繼以匱貧衣食所資悉資紡績比臣從戎朔漠漸列軍行適遇艱難累經戰陣北出恆趙西趨鳳翔或往鄴下或留河上臣母別臣積憂成疾禪誦之外流涕終日形貌支離殆於骨立及兩京旣復九方攸同臣在邠寧粗申力養豈謂無狀速禍殃罰所鍾深顧起復之恩永負劬勞之報興言及此摧心痛骨則臣母於臣異於常母臣之於母不逮常人誠合服縗廬墓以終餘齒豈可忘哀倖祿所務從權此則天地不容名教所棄伏乞納臣窮款矜臣血誠俯遂愚衷許終喪紀儻殘生未泯子道獲全必當竭力他年以答元造雖復殞身鋒鏑死且無恨無任荒迫之至

元宗大明皇帝哀冊文

王縉

維寶應元年歲次壬寅建巳月五日元宗至道大聖大明孝皇帝崩於神龍殿旋殯於太極殿之西階粵以寶應二年三月甲辰朔十一日將遷座於泰陵禮也象物已設仙馭將飛空聞脫屣無復求衣孝孫皇帝親臨遣奠意延晷刻向池綽而涕流想山園而心惻九天兮無所一往兮何極